

Projet : De Raubsaurier vu Bruch - C I

2 - Geschicht "D'Lis an de Pitt am Steebroch"

Et ass ee waarme Summerdag. D'Lis an de Pitt gi mam Ripp spadséieren. De Ripp ass hire kleng Mupp, an deem ass schrecklech virwëtzeg. Hie leeft ee Stéck virun hinnen, schnoffelt un e puer Blummen, luusst ënnert eng Heck, an op eemol bleift hie wéi ugeneelt stoen. Hien huet eppes erbléckst a kuckt gespaant op ee grouse Steen nieft dem Wee. D'Lis an de Pitt komme méi no.

Um Steen an der Sonn sëtzt ee klenge Déier mat engem laange Schwanz. Et wibbelt guer net, a wann et net heiansdo géif seng Zong erausstrecken, kënnst ee mengen, et wär aus Holz oder Plastik.

D'Bild vun der Eidechs ka gewise ginn. D'Kanner kënnen da beschreiwen, wat se gesinn. Wat ass dat fir en Déier? Wéi gesäit et aus?

« Eng Eidechs! » rífft de Pitt.

« Pssst! Verjo se net, Ripp! pëspert d'Lis an hält de Mupp un. Mee deem huet scho rëm eppes anescht entdeckt. Elo leeft en iwwert d'Wiss engem Päiperlek no. D'Kanner sëtze sech op d'Huppen a kucke sech d'Déierchen un.

« Wéi léif! » fënnt de Pitt.

« Jo, seet d'Lis, mee stell der vir, déi Eidechs wier riisegrouss... »

« Sou grouss ewéi eng Kou? » freet de Pitt.

« Nach méi grouss! seet d'Lis. Sou grouss, dass se net an eis Garage géif passen. »

Et geet ëm en Dinosaurier vu 6m Längt an 2,5 m Héicht. Elo kënnen mat de Kanner Repère fir dës Dimensiounen gesicht ginn.

Beispill: Si kënnen sech zu fënnef oder sechs um Buedem hannerteneen leeën (Kapp u Fouss) an d'Längt mat Kräid um Buedem markeieren. D'Héicht vum Dinosaurier entsprécht ongeféier der Raumhéicht.

Aner Repère wieren z.B. ee Camion, ee Spillgerät op der Spillplatz,...

« Dat wär awer fir ze fäerten! » fënnt de Pitt.

« An da misst se sech just nach opriichten an op den hënneschte Patte lafen, iwwerleet d'Lis, da wär et eppes ewéi ... »

Projet : Dinosaurier zu Bruch - C I

Bild vum Dinosaurierskelett weisen. Et kann och d'Bild mam Gréisstevergläich zum Mensch gewise ginn.

Wat ass dat fir en Déier?

« En Dino! ... » De Pitt réckelt e Stéck hannerzeg. Mee da stéisst en d'Lis an d'Säit. « Pfff! Dinoe gëtt et dach just an de Filmer! »

« Falsch! Dinosaurier gouf et wierklech! » D'Lis kënn sech ganz gescheit vir. Viru kuerzem hate si an der Schoul doriwwer geschwat. Elo kann hatt sengem klengen Brudder eppes bäibréngen.

« Et gouf ganz vill verschiddenen Zorten. Et gouf Dinoen, déi konnte fléien, anerer sinn am Waasser geschwommen, an nach anerer sinn iwwer de Buedem gelaf. Vill Dinoen hunn vu Gras a Blieder gelieft. A well se sou risegrouss waren, hu se schrecklech vill dovun gebraucht, fir hir déck Bäich ze fëllen. An et gouf Dinoen, déi hate schaarf Zänn an hunn aner Déiere gefriess. »

De Pitt réckelt nach e Stéck hannerzeg. « Hu se och Mënsche gefriess? »

« Nee, Pitt. Dat war viru ganz ganz laanger Zäit. Wéi nach keng Mënschen op der Welt waren. A well nach keng Mënschen op der Welt waren, konnten d'Dinoen och keng friessen. »

Wann et keng Mënsche gouf, wat gouf et dann nach alles net?
Eng Welt ouni Haiser, Autoen, Stroossen, Felder, ...

« A firwat gëtt et elo keng Dinoe méi? »

« Si sinn ausgestuerwen. »

« A firwat sinn se ausgestuerwen? »

« Dat weess kee sou richteg. Et heescht, eng gëfteg Stëbswollek hätt sech ausgebreet. Vlächent hu s'och einfach net méi genuch ze friessen fonnt... »

« Pfff! Mee hei bei eis gouf et där Dinoen dach keng. Och net viru ganz ganz laanger Zäit! »

« Rëm falsch! Ganz no bäi, zu Bruch am Steebroch, huet ee Mann eppes Laanges, Spatzes fonnt, wat wéi ee Bengel ausgesinn huet. Hien ass domat bei ee Wëssenschaftler gaangen, an deem huet erausfonnt, dass et den Zant vun engem Dinosaurier ass. »

« Deen Zant géif ech awer gär gesinn! »

« Da musse mer d'Mamma an de Pappa froen, dass se mat eis an den Naturmusée ginn, well do kann een sech en ukucken. »

Projet : Dinosaurier zu Bruch - C I

Op eemol spréngt de Pitt op. Wéi de Blëtz huscht d'Eidechs fort a verstoppt sech am Gestraich.

« Ripp, wou bass de? » Iwwert dem Gespréich haten d'Kanner ganz vergiess, op den Hond opzepasst.

« Ripp, Ripp! Komm hei! » ruffe s'allen zwee a lafen doruechter, fir no him ze sichen.

« A wann et dann awer nach esou en Dino gëtt? » freet de Pitt. « An deen huet de Ripp gefaangen... »

« Ma neeeen! laacht d'Lis. D'Dino sinn ausgestuerwen. Alleguer. Mengen ech. Rihiiiiipp! »

Op eemol raschelt et an der Heck.

« Do bass de jo! » ruffen d'Kanner erliichtert.

De Mupp kënnt erbäigelaft. An der Schnëss dréit hien eppes, wat wéi ee laange spatze Bengel ausgesäit.

Am Fichier 2 - Lehrerinformatioun fannt Dir d'Beschreibung vun der ganzer Aktivitéit.

Am Fichier 3 - Historesch Informatioun fannt Dir Informatiounen firwat en Dinosaurierzant zu Bruch konnt fonnt ginn an och wéi eng Fossilien een nach am Sandstee fanne kann.

Ueschléissend un d'Geschicht kënnen d'Kanner d'Dinosauriereeër oder den Zant ausgruewen an / oder d'Aufgabeblieder ronderëm d'Dinosaurier maachen.